

四庫全書

集部

欽定四庫全書

集部

五百家播芳大全文粹卷六上

中

詳校官編修<sub>臣</sub>謝振定

助教<sub>臣</sub>常循覆勘

總校官編修<sub>臣</sub>王燕緒

校對官中書<sub>臣</sub>范鏊

謄錄監生<sub>臣</sub>鄒世俊

欽定四庫全書

五百家播芳大全文粹卷六上

宋 魏齊賢

葉 芬同輯

謝到任表

守

秀州到任謝表

趙 亮

分符銅虎已乏功能賜對金鑾復叨任使眷三輔高華

之選豈微臣么麼之宜寵大難酬感深至泣

中謝

伏念

臣才疎識陋資淺望輕官箴常佩于公勤家法僅傳于  
清白始焉宰邑兩拜命而一到官繼以監州三冒恩而  
四書考逮桐川之承乏顧屏跡之奚勝尺度是循寸長  
何有臧剡屢形于當路薦章更辱于從臣粗逭曠瘼杳  
深僥倖終更歸奏再瞻天日之光亟玷誤恩躡實股肱  
之郡曾未淹于歲月已祇見于吏民矧樵李之名邦拱  
武林之行闕封圻廣袤井邑阜繁比緣經費之孔難非

若向時之易辦歲或遇旱人多阻饑俾無嘆息愁恨之  
聲孰先勞來安集之政宜得循良之彥上寬宵旰之憂  
退省非才曷膺繁委茲蓋伏遇皇帝陛下甄收衆善器  
使羣工謂臣久熟于民情頗知疾苦察臣稍長于吏治  
不憚勤勞責以維城畀之近地臣敢不益堅素志勉竭  
愚衷節用理財布千里中和之化省刑薄斂宣九重寬  
大之恩庶積涓埃仰裨海岳

石泉軍到任謝表

趙師必

九重賜對幸瞻日月之光一障乘邊仰戴乾坤之造方  
宣布于德意初奉行于教條被寵有榮撫躬知感臣

中

謝

伏念臣幸由屬籍起自書生作邑寧繼于絃歌承郡

徒酌于杯水挈舟南下親逢咫尺之顏剖竹西歸出守  
荒涼之地雖爲小壘頗係要衝內當寬疲瘵以令民力  
之蘓外當嚴訓閱以使邊烽之息必擇文武兼資之士  
方明惠威並用之方豈意愚庸得此僥冒茲蓋伏遇皇  
帝陛下仁全兼覆道大無私至公罔間于戚踈選衆酌

知其可否能下下以成政雖用人盡材然親親而任賢  
莫如我同姓遂令孱瑣亦預甄收臣敢不戢吏愛人憂  
邊思職當究備禦羈縻之術肅靜闕塵俾無嘆息愁恨  
之聲蠲除民瘼

英州到任謝表

楊威

贊畫計臺訖無善狀承流支郡薦沐洪恩負戰慄于淵  
氷荷生成于覆載已宣德意式慰吏民臣中謝伏念臣  
地望至寒天資不爽玷名末第坐閱一十四年游宦遠

方動逾三四千里一行作尉兩地親民偶收警捕之功  
竟拙催科之政猶將輸于漕幕幸離鄂渚之風濤宣屏  
翰于皇家敢憚嶺南之煙瘴矧滇陽之小壘控東廣之  
上流水火多災瓦礫之場猶在兵戈屢寇茅竹之屋僅  
存人稀土曠而田萊多荒費廣入微而財用不足家乏  
百金之產郡無一歲之儲惟注意于撫摩庶蘇民于凋  
瘵夫何假守誤及匪才茲蓋伏遇皇帝陛下承三聖相  
授之基享四海無為之治獨觀萬化允釐百工聲教所



臨不泄邇而忘遠材智並用姑捨短于取長遂令么麼  
之資亦與使令之末臣敢不講求民瘼革去弊源寅奉  
詔條行朝廷寬大之詔恪勤朝夕慕君子豈弟之宜庶  
効涓埃仰裨海岳

明州到任謝表

林 栗

泉爲鄉郡亟自列于親嫌明乃輔藩恐難勝于委寄顧  
恩私之未報寧軀命之敢辭臣

中謝

伏念臣門地單寒

性天愚拙每與凡人議見謂迂踈獨逢明主知憐其鯁

亮筮仕甫周于四紀立朝僅涉于一終外分八郡之符  
內忝貳卿之秩叨塵過矣報稱淺如比因獻納之睽馴  
致抨彈之嘖曲荷堯仁之覆姑從名令之矜畀以州麾  
幾類晝游之錦迫于妻黨翻成李下之冠所祈閒館之  
投何意近畿之授矧茲表海密拱行都有舟車商賈之  
饒兼營壘甲兵之衆肆求良牧必屬能臣孰云罪戾之  
餘堪備使令之數茲蓋伏遇皇帝陛下與善不求其備  
觀過或謂之仁見無禮于君察臣奮鷹鷂之志苟有利

于國許臣効螻蟻之忠雖衆論之弗容在兼收而罔棄  
臣敢不恪恭乃事循省厥愆思千里戚休夙夜若在身  
之疚儻羣情逆順東西亦性命之從繫犬馬之全歸寶  
蓋惟之大造

南康軍到任謝表

黃唐

抱慙麟臺愧乏適時之際分符星渚蒙推從欲之仁已  
延見于吏民首奉行於條教靖惟疎遠有此邀逾臣  
謝伏念臣性本顓蒙學徒獵涉頃因舍選獲踵儒官繼

濫吹于蓬山復攝承于蘭省周旋朝列僅一星終耗蠹  
太倉無纖毫補屬抗章而請外蒙疏寵以承流眷此匡  
廬瞰茲滙澤通商賈于蠻煙瘴霧之外環井邑于山光  
水色之中俗朴訟稀雖號江東之道院民貧土瘠全資  
龍斷之商征緩之則經用乏供急之則謗言時起有如  
方拙曷克調劑茲蓋伏遇皇帝陛下天德敕寧離明繼  
照察臣奮由阡陌或能牧養小民知臣久綴班行或能  
宣布德意臣敢不守節用愛人之訓善始以終庶惟良

其理之言不孤所寄

婺州到任謝表

錢象祖

乘軺江東曾何飛輓之勞剖竹金華復冒蕃宣之寵自

天錫命跼地懷恩臣

中謝

伏念臣初乏藝能早膺官使

游塵朝序首尾五年屢易守麾始終兩任第自知其不  
武慮有曠瘝每妄意于投閒覲安分誼比臨川之滿秩  
牽里社以去歸忽荷絲言往丞漕寄方馳驅之是愧豈  
撫字之敢期矧一州領七邑之繁上直斗星之次而三

洞占雙溪之勝素鍾人物之英且密介于行都實俯同  
于輔甸叨榮則厚審己奚宜屬皇渥之垂私適母親之  
抱疾控精神而祈免拜睿旨而莫回已即邦封敬宣條  
教深惟不腆切懼難任茲蓋伏遇皇帝陛下體健乘時  
繼明出照量才猷之克稱頒爵祿以惟均謂臣夙謹於  
公家必盡簡書之畏以臣頗更于民事或周閭里之情  
爰宅北兆人俾充茲重選臣敢不仰遵隆指厯考舊聞  
思乳雉之可馴庶獲希蹤於前哲念慈烏之反哺終期

退養于異時誓殫螻蟻之微上答乾坤之大

溫州到任謝表

樓 鑰

起家爲郡俄及戍期便道之官已共侯度戴睿恩而甚  
厚宣德意以具孚臣一介書生累朝世祿當聖主飛龍  
之始偶玷末科筵明時振鷺之班每安平進久與憲章  
之筆削屢叅史牒之編摩嘗佐治于偏州復勾稽于列  
寺天府貳邦財之重司宗書帝系之繁比終素輶之期  
忽冒朱轡之寄惟此東甌之勝實爲左浙之雄頃任冷

官茲叨假守山川如故風俗粗諳雖無竹馬之迎頻起  
蒲鞭之望以前日待諸生之意推及斯民於此邦揚泮  
水之波仰裨膏澤要令上下俱無于苟且庶幾田里寢  
銷于嘆愁此蓋伏遇皇帝陛下深軫黎元敷求長吏謂  
臣游登王國必能體惻怛之仁念臣四對天顏固無俟  
丁寧之諭是以左符分畀不待朝參嚴命趣行免加臨  
遣幸遂養親之志實勤戀闕之私臣敢不律已奉公平  
心待物惟忠惟孝誓堅終始之誠濟猛濟寬務勉中和



之政

饒州到任謝表

曹誼

鄙水更符俯遂引嫌之請延和賜對進承臨遣之恩廣

上德以布宣激危衷而祇懼

中謝

臣學徒泥古性且任

愚既弗能與世以浮沈抑不敢望人之比數晚晚桑榆  
之景棲遲塵土之蹤忽繇孤遠而列于輔藩自幸遭逢  
而勇于圖報謂受牛羊而爲牧豈容螟螣之害苗倘闕  
貧弱之戚休肯爲豪強而寬假謾戒多言之可畏不虞

衆怒之難任借交重結于狂朋投杼致驚于慈母理無  
自解分合投間敢期垂鑑之公坐照覆盆之下是非頓  
白榮寵載新雖聖主之智如神優辨中山之謗顧微臣  
之材至陋何堪即墨之封惟深淵谷之憂曷勝乾坤之  
造此蓋伏遇皇帝陛下明照庶物道濟羣生紹隆赤伏  
符念每先于民瘼乃矐黃金采令接近于王畿郡雖大  
而守輕地則偏而土瘠事權多奪而習成委靡供億實  
繁而馴致空虛政未返于和平俗日趨于凋瘵歲矧逢

于旱嘆人恐致于流亡將安鴻鴈之鳴嗷方覲蓼蕭之  
滲漉奚取鈐刀之一割猥蒙竹使之再放臣敢不敬佩  
丁寧益思奮勵奉法循理久懷漢吏之規著令稱忠誓  
踵番君之武

商州到任謝表

晁之道

護山澤之官愧久稽于薄效委符竹之寄俾卒就于前  
功仰戴恩私居慙冒昧

中謝

伏念臣偶緣科第獲列縉

紳顧常彈思于聖朝慙無與比未能妄意于事會愚乃

不移竊稽萬貨之源最重九府之法關陝之地漢唐所都采銅以爲錢乃不易之成憲無鐵以充幣蓋一切之權宜勢旣極則害愈深法雖嚴而力不勝惟前代鎔作之具厥迹猶存而比年興廢之端其數可考輒陳鼓鑄之便以適重輕之宜而異議橫生巧沮百出臣之身世雖九死初何足言國之事功乃中廢蓋亦可惜尚貸迂踈之罪曲施寬假之恩利害寔明虛實大判載塵委使仍竊便安此蓋伏遇皇帝陛下明察萬微智周庶物秉

至公以收羣策酌師言以効衆功謂因革者理之常惟  
更化則可善治而衣食者民之命故所欲皆不禁民臣  
敢不深佩至仁悉殫綿力撫綏疲瘵體虞舜愛物之心  
興起事功副夏禹厚生之意

亳州到任謝表

黃魯直

懷中奪宣城之綬以畀從官望外得亳社之符益慙小  
醜不勤傳舍旣見吏民問父老殫于財力之餘宣朝廷  
惠于鰥寡之意天實咫尺郡為股肱

中謝

伏念臣才資

下中學術淺陋沉迷簿領久從州縣之勞清問下民晚  
叨刑獄之寄在官曠守以殿投閒會開天臺慎東人物  
被先朝之識拔假郎位者歲年自狀短長無裨分寸為  
國宣力尚辦一城與民持平則有三尺輒傾肝膽冒昧  
高明伏遇皇帝陛下下一日萬幾六通四闢知人之福順  
于宗工卹民之深寄在牧守察其勤舊善于撫綏致滋  
叢爾之材獲奉欽哉之詔臣敢不烹鮮期于不撓牧羊  
去其敗羣使蚊負山何錙銖之能力以塵足岳亦臣子

之至情

興化軍到任謝表

張淵

蓬山收跡屢叨試郡之除粉社連陰適便過家之計已見父老恪宣詔條敢誇分土之榮莫稱隆天之施臣中

謝

伏念臣單平冷系朴拙孤跡少日績文濫次英游之末長年漫仕備嘗三世之難屬過聽于公朝許奏言于便坐顧山林闊疎之論親辱褒俞渠觀清切之班已逾涯分十年去國三命作州羈官滯留聞蜀禽而異感親

民牢落恍遼鶴之來歸仰聖度之包荒錄微能而器  
使稍紓黎藿且近松楸矧莆水之衣冠實閩南之鄒魯  
然以海壖綿亘而弄兵時警民心機巧而珥筆成風要  
當寬猛之適中孰謂疎庸之能辦此蓋伏遇皇帝陛下規  
模列聖綜核庶工謂臣奮自諸生必謹庶隅之守念臣  
守刺數郡不忘保障之恩用激愚忠畀茲便地臣敢  
不益堅志操廣布仁恩節用愛人務秋毫而勿擾抑強  
扶弱循令甲之至公上以寬朝廷共理之憂下以遂田里



舉安之願庶幾一得少塞萬分

池州到任謝上表

王龜齡

失職中司黜官小郡尚分符竹初見吏民咎大罰輕感

深涕隕

中謝

伏念臣起身寒苦涉學淺疏自甘窮老于

布韋孰謂冒榮于軒冕越從冗散親被簡知壁水道山

提攜羣彥綸垣鎖闥接武近班皆席上待問之珍非柱後

惠文之用忽蒙宸筆俾總臺綱義不苟辭輒奮蚍蜉之

力志慙無勇亟聞鷹隼之呼矧惟聖主之難遭亦恃孤

忠之可察封章上達遂忘白簡之猜嫌負罪左遷猶得  
朱轡之賁飾涵容厚矣報稱缺然茲蓋伏遇皇帝陛下  
湛恩龐洪垂聽寬裕執用賞用刑之要權使功使過之宜是  
致羣庸未從遠斥臣敢不宣布德意撫養編氓影落江  
湖踴躍自憐于去國夢追鴈鷺區區常念于愛君必誓  
糜捐仰酬覆幬臣無任

恭州到任謝表

謝深甫

濫分支郡之符才難守地獲上先人之塚恩實自天荷

大德之曲成拊孤蹤而增感臣

中謝

伏念臣曩緣餘澤

得被寵光粗知寅畏于簡書惟守相傳之忠孝暨臨劇

邑深愧罔功豈期合岳牧之言誤以玷冕旒之聽忽奉

詔俞之寵過膺堂察之榮從閩越之一同陞清源之半

刺載惟先世徃值中興憤強敵之渝盟伏中謀而致命

天厭亂事遠無成功時方急于修和義不辱于苟免逃

生彌歲羈死遠方雖松楸之念常切望雲而檣櫟之材

敢言擇地屬外補之有請需中命以疏榮改畀渝邦付

以承流之寄前通蜀道便以展墓之私夤緣獲對于清  
光瀝液冒陳于往迹動玉音之慨歎辱天語之褒揚極  
泉壤以生輝罄髮膚而曷報茲蓋伏遇皇帝陛下恢張治  
具激勵臣工天地雖大而仁及纖毫日月至明而光流  
節隙謂敬其父而子必悅惟教其孝則忠可求故遂其  
埽域之心欲示以匪躬之効臣敢不仰酬洪造誓竭寸  
誠資于事君已備知于德意堅于報國期不墜于家聲

青州到任謝表

崔正言

領郡遐方靡聞治効分符善地復自恩除揣分難安撫襟甚愧臣

中謝

伏念臣低徊末路黽勉衆流欲扶先閔

于旣衰誓畢微躬而自効宿春重趼僅廢半生陸駕川浮幾環萬里然連翩弱質樸櫟下材志慮冥頑而動輒迷方學術迂踈則終然昧道雖負移山之志迄無橫草之功止緣幸遇于熙辰遂獲猥霑于仕版宜從簡汰以警屏庸而戴德自天濫官有土過鄉上冢紆組綬以誇榮退食娛親戲綵衣而甚寵此蓋伏遇皇帝陛下需雲

敷廕蕭露布仁肆紹續于丕圖赫闡揚于前列恢兩儀  
之度無不生成眷一介之微皆歸器使故如臣之苟賤  
亦未斥于曠聞付以詔條寄之民社臣謹當掛魚勵操  
置水清心祇慎國章詳求民瘼蒲鞭不犯敢追配于前  
蹤襦袴興謠期復見于今日

遷秩

謝功賞轉官表

宋子京

秘錄終篇鴻都第賞例沾微祿數溢科條授受交虛榮憂

兩萃中謝竊以廣內之奧中經所藏自四聖相承凡七

紀而遠積丘山而盡在糅朱紫以未分金匱深嚴牙簽  
叢舛脩司傳失有詔部分疇簡名才總製都目體漢室  
之流略槩見所從叅史氏之藝文種分必類討論既定  
統紀悉周而僚輔他遷纂脩文集臣猥緣懵學俾與末  
行素自憊冥動咨典領雖片文殘牒時竄左文且雜語  
諸家尚悉前載訛慙數職中請爲邦遂專刀筆之煩益  
忘緹油之習不謂芸編卒業黻幄程文嘉衆籍之有條

美諸儒之競力因褒邇列施及孤臣汎文散之近階賜  
朝勲之優轉揆榮至渥撫已無堪閣筆居多早戢鍾繇  
之恨殺青偕上敢叨劉向之功汗渙不收天高難訴但  
能銘于肝膈或論報于涓埃

謝功賞轉官表

邵公濟

初約信書首預編摩之列載陳奏冊例叨進擬之恩感  
宸意之未忘覺衰淚之霑落

中謝

恭惟皇帝陛下道隆

前緒業茂中興當故都金匱石室之藏已空致先朝豐



功偉績之實未顯孰及闕文之史殆同補亡之詩爰脩  
掌故之官少緩武步之事屢興當宁之嘆思慰在天之  
靈慎選通儒專功上宰君子之能事既畢矣聖人之大  
孝何加焉臣方偕俗吏以鴈行嘗備太史之馬走聖經  
絕筆冒居游夏之無辭大典成編益嘆文武之善繼

謝八寶赦轉官表

代

晁之道

享帝洪休受天大寶歡騰海宇慶浹臣工均載寵榮獨  
慚冒昧

中謝

竊以聖德昭格天心眷懷必有甚異之珍

符以永無疆之大厯顯揚玉粢備舉上儀於昭列聖之  
光大備一王之制肆頒非常之惠澤用侈不世之休祥  
如臣冥頑荷國寵渥前叨優叙今值恩遷自矜流落之  
餘併切便蕃之幸此蓋伏遇皇帝陛下堯仁舜孝湯智  
禹功集此大成施于庶政神靈昭答符瑞駢臻實萬世  
無窮之休俾羣臣並受其福遂容孤蹇預竊恩私宣化  
罔功寵或疑于加秩逢辰至幸報敢憚于捐軀

謝八寶赦轉官表

張成季

甫除罪籍遽進文階望遠雲天特預一時之澤光生簪  
綬如非前日之身寵至若驚感深成涕

中謝

伏念臣材

猶社木性實絀人初非可用于時終有自貽之悔間屬  
禮陳八寶慶洽萬邦赦其既往之愆開以從新之路雪  
霜制物天將使之成材鞭扑御家父終無以棄子矜憐  
舊物安養殘年復陪多士之步趨再奉真祠之洒埽已踰  
望表仍玷序遷未聞圖報之一端併沐流恩之三錫此  
蓋伏遇皇帝陛下大道善貸至仁無親凡百姓皆得其

心靡一物不遂其性聖功不冒瑞應並臻嘉與庶工共  
承多福而臣偶緣幸會濫服寵休遂除蒙瑋既容可錄  
支離受粟深愧無功敢不誦明訓以刻肌披愚衷而指日  
倘萬分之有補視九死以如歸

謝轉官表

汪彥章

小儒懵學安能及史之闕文聖主隆寬乃閱奏篇而稱  
善頌陞遷之茂渥錄蒼萃之微勞顧臣何功辭不獲命  
中謝  
伏以春秋之作法必始于編年書契以來國豈容

于無史自昔祖宗之相繼至今文獻之足稽中更搶攘  
浸失詮次既憑筆削以傳後安可見聞而異辭乃殫鉛  
槧之功上竇冕旒之遽由太初之後而無錄雖幸纂成  
問祈招之詩而不知固多脫略敢圖抵牾遠辱褒嘉茲  
蓋伏遇皇帝陛下垂意藝文增光謨烈念兩朝之政事  
無一字于史官倘緩編摩懼成放逸劇憐苦志屢遭尚  
白之譏爰進周行俾冒殺青之賞臣敢不博詢耆舊追  
補散亡若書成果遂于山藏庶禮失不煩于求野

謝轉官表

施師點

奉清光于儲禁莫効微勞頌渙渥于慶霄猥承異數辭  
不獲命愧豈勝情臣

中謝

伏念臣學術本迂智能素乏

自綴員于書監嘗無侍于經帷更歷五年之間前後四  
陞其職任莫專于端尹寵尤極于東察慙無涓埃補報  
之功曲荷海岳包容之賜洎躋榮于二府皆托蔭于重  
暉萬物雲從方快中天之睹長安日遠亦霑零露之恩  
兩階優崇百拜祇懼茲蓋伏遇皇帝陛下緝熙聖學眷

禮儒臣尚記初蹤曾叨于攀附更憐晚節益厚于褒崇  
靜惟小器之易盈宜引遜章而亟上寵頒鳳詔拊躬方  
切于兢慙祇佩鴻恩稟命不勝于俯僂

謝轉官表

晁之道

勉營職業苟違譴訶忽綸綍之下頒驚靈寵之驟及感  
深涕瀟愧極汗顏

中謝

伏念臣早以散材屢更繁使實

人微而任重致力憊而憂深獨恃保全久容尸素究觀  
本末初乏涓埃敢虞過譽之言遂徹蓋高之聽憫其盡

力雖無可紀之勞能誓以捐軀粗有不移之忠朴超加  
顯秩曲賁枯根服溫厚之訓詞佩光華之新渥併爲榮  
耀倍極兢慙此蓋伏遇皇帝陛下大德川流至仁天覆  
畢照萬方之遠集成庶事之康謂勸使于官師必厚加  
于爵賞乃推誤寵以及罔功負戴深恩彌覺丘山之重  
馳驅晚節自忘蒲柳之衰倘補萬分寧辭九死

謝轉官表

蕭燧

鶴禁侍言初乏一毫之益龍飛臨御遽叨兩秩之遷弗



獲固辭深慙虛受臣中謝伏念臣學惟涉躋識本迂踈  
頃濫預于政機每聳觀于叅決遭逢特異榮幸滋多運  
膺九五之當陽恩厚尋常之賜爵雖上聖罔遺于故舊  
而微臣猥荷于眷憐蒙疊組之優崇顧循墻而控避存  
頒溫詔仰戴鴻私茲蓋伏遇皇帝陛下纂紹丕圖恢隆  
至治慶覃無外矧依日月之光澤潤有加不忘簪履之  
舊顧如衰晚亦被記存荷雨露之沾濡實鄉閭之焜耀  
在江湖之上難補報于君恩居畎畝之中第謳吟于聖

德

謝轉官表

邵公濟

天邑鼎成申錫維新之命羈臣永廢亦叨念舊之恩進  
秩有加出綸甚渥訓詞熟讀感涕無從臣中謝伏念臣  
以坎窞百謫之餘在坤維萬里之外昨遇靖康之初載  
誤蒙淵聖之深知偕前輩以同升非平生之敢望擢從  
九列徑貳六卿屢對清光每陳迂論時城下之師再黷  
而復退故河東之警一麾而亟還豈期已誓而復渝終

作前和而後戰燕雲之師藉口而並入并鎮之域轉盼而遂危直度洪流大侵近甸朝廷不能割土地以自保君父又欲守社稷而不遷罄竭孤忠招携同志匪函奏疏殿陛抗言荷聖主之優容憤權臣之弗納歷考古人之禦寇罕聞王室之受擒會遷岐避狄而不爲徒堅壁清野而受困甲冑躬擐雖大慰于六軍矢石親臨本何煩于萬乘忽偏隅之自潰蓋敗勢之難勝噬臍之悔何追逆耳之謀誰聽網羅八面涉歷三時潛穴以散居登高

而下瞰由金湯之失守致鑿輅之在郊痛哭脩門頗類  
喪家之狗偷生委巷真同游鼎之魚夫何誤國之謀見  
此嬰城之效逮金人之旋邁邀二聖以遠征風雲至于  
慘悽日月爲之掩翳未容速死思究後圖乃于旬浹之  
間重起億年之祚迎天王于代邸奉太母于東朝宗廟  
不移衣冠如故惟神臯之卜宅實王氣之所儲臣偶忝  
居留獲司版築興百堵之大役成千雉之舊規復還樓  
觀之鬱蔥盡滌溝池之汙穢而臣負罪被逐何勞可書

詎意皇明俯憐棄物時加褒賞用勸縉紳此蓋伏遇皇  
帝陛下念藝祖創業垂統之大功繼神皇設險固國之  
遺志當百六之厄運獲九五之至尊巡狩有方始示柔  
于強敵宅中圖大終浸福于羣黎臣敢不仰戴鴻私益  
堅晚節方避賜環之寵敢言俟駕而行疾病無堪卧巴  
江而死逼太平有日冀魏闕以生還

謝轉官表

張全真

紀十年塵腐之微勞申加訓諭增三品清華之峻秩莫

獲固辭登受以還懷慙罔措臣中謝伏念臣名浮于實

用過所長氣既衰而當戒得之時位已高而有疾顛之  
懼居常退抑祈免悔尤况律令三尺安出哉率祖宗坦  
明之制所損益百世可知也實察吏纂修之勤自惟罔  
功何有于賞敢謂制祿之書來上策勲之典遂行例辱  
進官之榮曲憐承乏之舊此蓋伏遇皇帝陛下以上聖  
之質致中興之圖孝通神明坐復寧人之疆土恩被動  
植灼知臣下之勤勞既講信修睦以和諸戎故任賢使

能以成其政善雖微而必錄功並久而不忘致令不才叨此非據匪言揚而事舉已虞竊位之譏顧政拙而心勞未識報恩之所

謝轉官表

汪彥章

投閑得請常懼空餐會課當遷復叨信賞誤大恩而莫報持餘日以安歸

中謝

伏念臣去國九年奉祠兩任生

平慙直不隨世俗于雷同歲晚棲遲乃望君門而雨絕孰云磨鈍之具復及養疴之臣茲蓋伏遇皇帝陛下

攬乾綱躬膺歷數宵衣旰食十年不廢于憂勤寸地尺  
天一日悉歸于覆載冠帶萬里賞刑百工而臣授老江  
湖竢填溝壑陪議論皁衣之後雖愧名官奏絃歌清廟  
之初敢忘抒頌

謝轉官表

歐陽永叔

天地號令風雷鼓行一氣所均萬物咸被遂容僥倖亦  
與褒升臣中謝伏念臣材不逮人識非慮遠徒有事君  
之節未知報國之方冒寵貪榮已踰其量見利臨得魯



不知慙此蓋伏遇皇帝陛下堯舜聰明禹湯勤儉修前  
王之曠典述先志以繼成昭致精禋躬臨路寢膺受上  
天之多福推與萬方而不私臣于此時限于官守講儀  
制禮不預議郎博士之流助祭陪祠不在諸侯萬邦之  
列既乏一言之獻又無執事之勞徒隨翟閭共享餘賜  
普天率土難異衆以獨辭跼厚躋高但撫躬而無措

謝轉官回授表

汪彥章

邊捷上聞肆頒明賞政機無補輒冒殊恩超踰既極于

周行褒寵更延于私屬仰承休命莫惜微躬中謝伏念  
臣初乏技能早膺掄擢雖玷機衡之末誰知帷幄之奇  
比興節制之師采入襟喉之志赫然成算斷以淵衷靡  
逾旬歲之期坐褫種羗之氣乃示訓詞之寵兼收丞弼  
之勞惟帝念功宜考經綸之素如臣何力亦叨閭閻之  
榮茲蓋伏遇皇帝陛下道本曲成仁無偏愛方舉策勲  
之典不忘充位之臣雖平時無橫草之功幸今日遇采  
薇之捷錫之茂渥同此膚公碌碌因人愧股肱之選

拳拳許國誓肝腦之糜捐

謝轉官表

汪應辰

伏覩勅命以臣知池州日守禦有勞特轉一官尋具狀  
辭免蒙降詔不允者承流遵職恩寬罪戾之餘糾衆戢姦  
責在封疆之守徒知竭盡敢覬褒嘉顧遜避之莫從但  
兢慙而失措臣中謝伏念臣奮身寒苦遭世休明推遷  
浸歷于華塗放逐尚分于小壘不虞羣盜復擾隣州終  
勤虎旅之來坐致湯池之固因人成事碌碌無橫草之

功忘戰必危赴赴有干城之武逮茲懋賞輒復露章仰  
靳曠蕩之恩均及偏裨之士詔音開允輿論豔歆退自  
省循實爲僥倖茲蓋伏遇皇帝陛下示天下以大信得  
民心以至仁冠攘宜誅盡掃荏蒲之聚膏澤所及弗遺  
蕭艾之微矧是孤蹤夙塵從列旣佩循環之寵仍叨進  
秩之榮視若介鱗猶能思于報効加之鞭策期必徇于  
靡捐

五百家播芳大全文粹卷六上

欽定四庫全書

五百家播芳大全文粹卷六中

宋 魏齊賢

葉 芬同輯

謝表

遷秩

謝南郊加恩表

歐陽永叔

紫壇高峙式薦于精禋皇澤霽流推行于大慶祗膺寵

數伏切兢榮中謝伏惟皇帝陛下出震膺期繼文興治  
百度講明于新政羣生涵泳于至和乃考舊章聿思報  
本謂三歲一郊之禮必舉以時俾四海九州之人並受  
其福遂因景至躬款陽丘萬國充庭其誰敢後六卿聯  
事各以其官而臣職忝頒條位拘守土執豆籩而祇役  
罔獲施勞逮輝翟之餽餘遽蒙均位無功受賞莫遑俯  
偃之辭盡瘁事君惟誓糜捐之効

謝南郊加恩表

王介甫

解澤旁流明綸俯被永惟叨昧深以兢榮

中謝竊以時

郊丘之承所以尊上帝壽官邑之賜所以富善人盛福  
靡專至恩惟稱臣久塵要近上累昭明方玉輅之親祠  
以銅符而外守逮均休寵例獲褒嘉此蓋伏遇皇帝陛  
下以平施于萬方無遐遺之一物矧蒙圖任之舊特受  
獎知之深祇服訓辭敢忘報禮

謝南郊加恩表

蘇子由

元祀告成靈貺昭答推廣乾坤之施普沾臣子之私顧

惟何勞竊冒斯寵中謝伏惟太皇太后陛下母儀三世  
坤載四方享天下之養而非以厚其身攬天下之務而  
非以私其族培附帝業保佑神孫譬如農夫之養苗耘  
耰以俟其長王人之作器琢磨以望其成厲之以講學  
之勤示之以聽斷之敏導之事天而天錫之福訓之祀  
地而地應以和凡下民所以知戴吾君皆東朝有以啟  
迪其意如臣等輩絕企光塵既因時以舉儀應肅將而  
從事參備羽衛進執豆籩豈有勞能坐被光寵此蓋伏



遇太皇太后陛下因脈膳之餘慶錄左右之微功以謂承天之休不可以專享及物之惠不嫌于過優致此誤恩首沾近列辭避無所寢興莫遑

謝南郊加恩表

汪彥章

禮洽中天慶覃外服猥奉十行之詔就加五等之封

中

謝

伏念臣積冒恩私浸踰分願昨投閒于異縣蒙起廢

於偏城久客還家方憇南歸之鵲通侯授印忽成左顧之龜雖滲漉以惟均何遭逢之獨異茲蓋伏遇皇帝陛

下調御萬類審飭羣工屬宣室之受釐釐寰區而蒙福  
臣適臨本部仍胙鄉州宋人泝泝以得封望胡及此漢  
將銀黃而誇里榮乃過之寵既遠於子孫忠敢移于生  
死

謝南郊加恩表

秦少游

宗祀以配上帝盛禮載陳大封而錫善人彝章具舉寵  
靈誤逮媿懼交深中謝伏念臣學術本迂器能素拙徒  
屬休明之運獲叅英俊之游發金匱石室之藏討論何

補承神州赤縣之乏瘵曠偶逃晚自喉舌之司亟更管轄之任辱甄收之已過知報稱之尤難比出近藩猶通秘籍會考我將之頌頃稽公玉之圖路寢爰開總章斯寓涓季秋而精享肅羣后以駿奔熙事備成旣盡情文之典湛恩汪濊遂周中外之臣魯是孤蹤亦膺殊祉崇勲具進真食驟增奉綸詔以凌兢仰雲天而隕越此蓋伏遇皇帝陛下天仁丕冒海德包函尚記憇愚嘗陪於國論更憐衰晚方守于郡章俾異數之併加示純禧之

均界甘泉緬邈難望屬車之塵清都邃嚴徒想鈞天之奏

謝明堂加恩表

晁无咎

祇帝合宮穆神休之如在施仁寓縣藹民氣以爲春預陪冕黻之嚴均被勲封之錫中謝伏念臣自參機政寢歷歲時任重爲憂寵至是戒高明日運徒知聖德之不違忠樸慮殫滋愧王功之無補逮總章之親祀肅羣辟之具來玉輅未臨雨先馳而戒道黃流旣裸日純耀以

排氛仰惟信順之所章此豈贊襄之可及已告成于釐  
事肆大賚于寰中衍食增封駢休沓寵此蓋伏遇皇帝  
陛下孝慈致治精稷格幽跡其始基固可效天而法地  
推諸極至自當咸五而登三澤無一物之不加惠始近  
臣而下逮未知報禮祇有捐軀

及第

謝狀元及第表

代

汪彥章

襲慶璇源幸備維城之列陞榮桂籍俄先入彀之英廣

陞臚傳諸儒環視共欣千載之嘉會親值一人之至公  
中謝嘗謂朝廷設科目以致英豪學者用文章而取富  
貴故自布衣之士有終身鉛槧之間既登鴈塢之標題  
至比龍門之變化豈有恩隆于帝胄更令名玷于賢書  
班聯玉笋之華光動金枝之秀由聖德曲成於大小視  
人材無間于親疎慮汨沒于膏粱特甄陶于翰墨肆垂  
淵問猥及孱蹤仰慚聖化之深雖能僅綴俯揆天資之  
陋終愧無奇甫上奏篇遽塵殊等鵬擊天潢之浪鶯遷

帝苑之春茲蓋伏遇皇帝陛下長育羣才并包衆美謂  
秦之士賤由先王教養之衰方周以宗強宜近屬獎成  
之急倘不俯同于寒畯孰為自致于亨衢昔慙假寵于  
分茅今喜成名於拾芥繫君父義方之素致邦家儒術  
之尊臣敢不敦尚詩書勉思忠孝既與在廷之多士同  
值文興將令就傳之百男悉從隄始

謝狀元及第表

趙莊叔

君門九重入奉臨軒之問愚者千慮誤叨絕等之恩非

臣踈愚所克負荷中謝伏念臣才質迂下學問空虛驟  
起草萊不識朝廷之忌諱輕獻狂瞽蓋本忠義之激昂  
敢期一日之間辱在多士之首此蓋伏遇皇帝陛下文  
武天縱輝光日新方恢中興之功不求匹夫之備謂臣  
言語之至拙察臣志趣之非邪特畀殊科以主正論臣敢  
不洗濯素志益勵前修恩重丘山敢自榮而僥倖身輕  
絲髮寧有憚于糜捐

謝賜弟安國及第表

王介甫



雋人之求外覃草野龍光之施首逮門庭

中謝

竊以躬

國論聽斷之繁而察知孤遠之行略門資貢舉之法而  
拔取滯淹之才山林之所誦說而難遭閭里之所驚嗟  
而罕見伏惟皇帝陛下協德穹昊比明義皇溥臨四方  
洞照萬物如臣同產為世畸人少遭憫凶自奮寒苦雖  
力行強學粗有時名而少偶寡徒幾絕榮望豈期聖聽  
俯及幽潛遂使窮途坐階華寵獎以詔書而試藝賜之  
科第而命官祿不逮親既永乖於養志仕非為己當共

誓于捐軀

謝弟安國得館職表

王介甫

書林置職方儲高位之才詔版推恩遂假私門之寵在  
于疵賤實以兢慙

中謝

伏念臣初起孤生非謀撫仕中

參近侍特荷先朝屬憂患之相仍分湮淪而自棄敢圖  
收召俯暨幽潛服在臣鄰驟冠論思之列恩加子弟具  
膺慶賞之延有冒昧于殊私或超踰于常法惟數竒之  
同產嘗義困于稠人第冊西垣比前叨于睿獎校文東

觀更曲被于明揚此蓋伏遇皇帝陛下與善無方使能以類欲阜成于大治務博取于衆材遂忘形迹之嫌以溥龍光之施衰宗旣亢唯知上報之難小己易盈彌懼先顛之疾

加贈 任子

謝太師加贈表

張欽夫

日月昭回燭孤忠於旣沒風雷鼓動詔卹典于無窮藐然惟孤重以隕涕中謝伏念先臣早趨列著卽值多艱

痛陵廟之莫扶嘆簪紳之自保以爲寇讐若此豈臣子之遑安義理所存何利害之足計會真人之勃起先百辟以駿奔奉命于危機洵湧之秋投軀于衆難紛紜之際以至進登揆路盡護戎車不憂強敵之方張惟懼人心之不正炳若丹青之誓率茲縞素之師雖蒙聖神之深知亦致姦邪之橫疾擯居炎服中逾二紀之更敢意餘齡復際重明之運竊窺睿蘊思復祖疆願畢効于精誠冀平清于氛祲而割地奉讐之論起合黨締交之謀

深修邊備則指爲費財講武功則目爲生事妄擬偷安  
于歲月曾微却顧于興衰非惟沮先臣之爲實乃傷陛  
下之志鑠金成市卒賴保全易簣餘哀空成感慨悵歷  
時之寢久忽當饋以興思中旨顯頒褒章具舉旣極上  
公之貴復稽節惠之文人知忠義之榮莫不競勸士喜  
是非之定少緩私憂固將垂訓于邦家豈但增光于泉  
壤此蓋伏遇皇帝陛下勤儉法禹聰明繼堯締武經文  
不慙于宗祏彰善癉惡允若干天心敷揚舊勲表厲在

服誦溫言之曲盡仰至意之旁乎臣猥以承家極茲追慕奉牲以告知神理之來歆聚族而謀念上恩之曷報惟慕先臣之許國力圖後日之捐身

謝任子表

代魏王

呂伯恭

列第環宮方極奉承之樂周廬設衛載延似續之榮舄奕觀瞻凌兢佩戴竊以東平諸子印猶限于能趨魯國五名類僅稱于同物疇若覃龐恩於襁褓矧惟錫美稱于冕旒此蓋伏遇皇帝陛下高視穆清游心昭曠巍巍

蕩蕩共瞻太極之尊繼繼承承爰篤曾孫之慶願訓成  
于幼學用克對於鴻私

謝任子表

代

溫清承顏慈極夙成于椒屋焜煌發命光風初轉于蘭  
芽吉語甫傳微躬載惕竊以元氣兩儀之運資始資生  
天枝四葉之祥以嗣以續慶流繁衍爵及攜持此蓋伏  
遇壽聖太上皇后殿下德冠河洲化孚宮闈周邦胥喜  
惠既篤于曾孫晉錫用蕃福本承于王母願益開于蒙

昧庶仰答于坤元

謝任子表

宋子京

聖澤下頒詔綸有煥慶叢閭闈光動里閭中謝伏念臣  
退跡粃粃餘年種種尚叨儲傅之秩許懷家巷之安養  
且有人德將焉謝近緣誕聖之節更陳延賞之求伏蒙  
皇帝陛下大度包荒至慈及物甫從人欲即霈臺恩孝  
治方隆許及宗親之末衰容無狀更流枝葉之榮揣分  
既逾糜軀曷報



謫降叙復

起復

謝降官表

晁之道

職在撫綏事當備預弗謹授衣之令仍稽典閱之期合  
即嚴誅止從貶秩厚恩莫報感涕徒揮

中謝

伏念臣稟

資甚愚涉學至淺但期立事初不爲名適濟明時遂叅  
法從往再塵于重鎮思勉効于寸長旅力旣愆智能又  
寡昧詔條丁寧之訓忘將士輓瘡之虞辜負使令一至  
于此思惟罪戾胡可勝言保生實恃于好生竊食尚叨

於逸老此蓋伏遇皇帝陛下至仁廣覆惠澤旁流俯矜不逮之愚曲示惟輕之典病瞻天日彌懷顧影之慙老死丘園終負裹尸之志

謝罷給事中表

胡文定

伏覩臣寮上言以臣不合辭免恩命乞賜黜責爲人臣之戒奉聖旨前降給事中指揮更不施行者宿疹沉綿稽違成命巧詞彈擊寢罷新除威邇在顏感深銘腑中謝伏念臣稟資至陋得數多竒徒險阻之備嘗未悔尤

之能寡早年擢第歷仕四朝晚歲蒙休叨官二省值強敵憑陵之際輸從臣獻納之規頻觸權豪坐貽澄斥間關千里慘淡百憂但驚疾病之益侵豈復恩榮之敢覬寶圖有永神武中興得人欲濟於艱難取士不遺於羈散召自荆扉之陋超居瑣闥之華劍佩相磨風雲初合自嗟薄命獨負危病恐顛路于道途遂傾祈於旒扆未回隆渥已嘖煩言假如侶楚澤之蟲蛇託生蝸舍孰若綴周行之鴛鴦平奏鸞臺身陪鳴玉之班腰束黃金之

賜本非失性素不疾狂忍干浸令之刑乃要流俗之譽  
毀深銷骨自昔興嗟德大包荒于今爲幸伏遇皇帝陛  
下堯仁天覆湯聖日躋廣施雨露之恩特霽雷霆之怒  
俯憐孤跡免寘大罰臣敢不念已知非動思觀過處衡  
茅而守約勤藥石以扶衰謂不謹前益當善後廢而可  
起倘溝壑之未填志或少伸冀消埃之能効

謝謫黃州監酒表

張文潛

矜其多病祿之先聖之祠誅其積愆斥之筦權之任雷

寔既震螻蟻過罪大責輕感深涕隕中謝伏念臣粗  
親翰墨篤好文詞曾未窺其藩牆安見稱于流輩寔蒙  
寵祿頗躡等夷久讐中秘之逸書與記漢家之故事入  
侍帷幄曾未歲時而疾病侵凌精神疲耗一辭螭陛兩  
換虎符蔑聞報政之能徒幸養病之便投閒置散于分  
為宜號寒啼饑其窮已甚方大明于淑慝固無遁于誅  
夷唯是齊安近在淮右雖薄加于黜削乃猶卽夫便安  
非大明之燭幽顧微生之何恃茲蓋伏遇皇帝陛下至

仁溥及盛德好生謂刑以正邪用之初非獲已而罪非  
極惡議之必傳惟輕遂至夙愆猶逃大戮臣敢不改心  
思過擇地圖新駕馬已疲久息鏘鸞之望秋葵未殞常  
傾向日之心苟一介之有施終九死而無悔

謝謫南京通判表

晁无咎

小已下僚昧于職守盛時公議特此貸全未使廢閒猶  
叨安便媿深汗溢感極涕橫

中謝

伏念臣家世凋零在

朝廷者無幾人材闡茸所學問者又非猥迫寒饑出營

仕進本自安于常調固絕望于亨塗庶幾孤愚不越分量而偶弼臣之一薦濫文館者十年初無毫毛得被驅策徒累資任以資麾符臣自揣思久當顛沛加以祚薄多故器小易盈不能恪居于其官遂使咎生于所忽幸仁聖矜其如此故迂踈尚以并容第解郡章旋需祿食將母之幸于臣已多德大施隆身微命賤成遂莫悔啟處若驚恭惟皇帝陛下明目達聰與人爲善畢修祖宗之舊政遍攬中外之英材建官惟賢宥過無大雖馮生

之螻蟻亦蒙賴于乾坤臣敢不謹畏自新忠誠內誓念  
洗心以償罪譴既貿貿無可言忠發憤以赴功名久區  
區不足道報恩無所碎首爲期

謝謫兗州通判表

晁无咎

咎悔難追一更寒暑嫌疑自列敢憚道塗再服寬恩重  
增感涕中謝伏念臣粗知學問本乏材能仕豈爲貧慙  
居卑之亦分家雖稱善傷餘慶之已微嘗念居不可以  
求安福孰先于無禍故六年遷徙甘常困于米鹽而羣



從凋零祇自憐其形影未敢當江湖飛集之數何足掛  
朝廷論議之間每欽宥過無大之仁則思見危致命之  
義未試以事孰明此心諒與金之已多誠挈瓶之何有  
但知揣已皆是踰涯恭惟皇帝陛下惟時憲天常善救  
物稽先朝之美意與治古以同興謂蕩蕩民無能名佑  
啟我以正故業業日致其孝繼序思不忘蓋欲得萬國  
之歡心足以斂五福而敷錫雖甚微鄙不終棄捐重念  
臣頃迫養親久從補外昨由公坐得譴止以佐官連書

亦既累年實更三赦事雖自致情則無他庶省循苟免  
於人非或湧洗稍容於國是犬馬能報况服冠裾櫛櫟  
無堪猶足燔燎終自知其死所不敢愛於捐軀

謝謫知滄州表

李成季

禮官失職甘俟嚴誅邊壘析符尚叨優寄以不可貸之  
罪蒙非所望之恩驚魂既還零涕無已

中謝

伏念臣迂

踈無取選慙不持惟知任物以直情不思周身而避患  
每事必問己失仲尼之前知三思乃行終違文子之常

誠一昨奉太母因山之制謹百官趨事之期夙有司存  
各以類舉逮壽宮之易奠道虞主以告行竟達空函幾  
敗乃事既身爲之官守反自闕于禮文仰誤神靈之依  
中櫻仁孝之感過莫大者誰其歸之固當戮以市朝可  
復付之民社眷浮陽之封壤控北敵之喉襟澤浸稽天  
雖馬牛之弗及風聲屬耳寶鷄犬之相聞宜得望人以  
壯方面敦詩閱禮鎮以靜安緩帶輕裘應之閑暇况乃  
大河泛濫之後一方饑窘之餘必先謹養以惠和尤在

周知其疾苦如臣孱暗非所克堪伏遇皇帝陛下天地  
同仁日月齊照澤及行葦每思視物以如傷網漏吞舟  
不忍向隅之獨泣聊褫官而示罰猶守土以長人臣敢  
不砥節奉公肅心悔過盡爲臣之道于事無難推愛國  
之心以民爲貴誓殫夙夜少補毫分觀海知瀾究隔蓬丘  
之望舉頭見日長存魏闕之心

謝謫定州通判表

汪彥章

衆惡必察宜即嚴誅罪疑惟輕止從薄責袞袞誤登於

臺省漂漂復返于江湖 中謝 伏念臣家世故寒材能特  
陋竊慕古人之力學偶陪多士以進身編蠹簡之十年  
最爲椎鈍隸鸞臺之一月俄致顛隳由非才冒處于必  
爭故公論不容于反擊猥煩簡禮有玷簪紳尚依魚稻  
之鄉獲近粉榆之壤若非洪造豈有餘生茲蓋伏遇皇  
帝陛下博採智能䟽觀情實謂虛舡觸舟而褊心不怒  
雖以無他然強弩射市而薄命先遭莫非自取姑捐稍  
康使活妻孥臣敢不仰佩訓懲俯深循省日嬰簿領甘

爲俗吏之沉迷坐置銘詩誓復平生之玷缺

謝降官表

蘓子由

罪大恩寬言者未厭官高德薄法所不容尚領真祠實

出寬憲

中謝

伏念臣早塵近列無補明時下則拙於身

謀上則闇於國體先朝矜其愚陋宥以遐荒前後七年

浮沉萬死偶真人之御歷敷大號以維新普復舊官亟

叨厚祿然臣年迫衰暮知復何爲身利退藏顧未敢請

因循于此黽勉自慙雖復追削者五官仍且獲安於閒

局涵恩至厚爲幸已多此蓋伏遇皇帝陛下以堯舜之仁行成康之政衷未忘於舊物恩許畢其餘生臣謹當杜門躬耕沒齒蔬食知生成之難報姑靜默以待終

謝降官表

李成季

臣某言八月二十二日都進奏院遞到官一道特降授承議郎差遣勲賜如故臣尋跪授訖禮恩被黜方在退思勅局示懲止從薄責重干文憲疊負縶痲撫已兢慙感恩零涕中謝伏念臣斷斷不敏碌碌何知初無奇警

以動人每以疎愚而取禍詩禮之訓幼則嘗聞刑名之書素知未學偶預都司之進擢適當常憲之變更宰府任以官寮惟命所赴法吏摘其紙尾謂可則書文旣失於舊章罪寧逃于顯戮止從貶秩尚玷承流雖天地無所不容而犬馬何以爲報此蓋伏遇皇帝陛下聰明睿智以獨斷慶賞刑威之必行遵制揚功永懷善繼亂名改作先務謹誅謂使人改過則能盡其忠故用罰以寬而終歸于恕臣敢不省身夙夜砥節事功知無不爲庶



竭事君之義死而後已益堅報國之心

謝出籍表

李成季

滌瑕蕩穢共承雨露之需濡振衣彈冠莫知手足之扑  
蹈追惟前日感涕厚恩中謝伏念臣生也有時仕而無  
學智識非遠議論甚卑每慙事往而知非不悟才疎而  
多累西干吏議三丐宮祠于願不可以適河猶叨豢養  
敕惟或堪于裏馬未即棄捐間者上帝降康天祇薦瑞  
備成寶刻均福蒸民敢期負累之餘生亦惟竄名于載

籍此蓋伏遇皇帝陛下愛人無已視物如傷賞罰之公  
時乃天道予奪之節本于人情謂法以示懲旣已屢更  
其歲月過而必改誰將自棄于君親曲示涵蒙一從湔  
拭而臣計功無取蹈悔良多載省始終方酌萬一蓋嘗  
喻父老以戴上之美意教子弟以事君之小心長歌天  
保之六章百拜封人之三祝雲天在望但知傾日以爲  
心溝壑未填尚冀殺身而報國祇敷誠悃莫罄名言

謝復官表

晁之道

曩緣失職稍削文階今戴誤恩悉還舊物徒揮感涕載

激懦衷

中謝

伏念臣陳力無堪叨榮有覲惟關陝轉輸

之任號爲至繁顧江湖樗散之姿宜其弗稱果緣曠敗

自速譴訶深惟萬化之曲成不以一眚而遽去仰蒙全

度猶玷驅馳曾未蓋于前愆忽載叨于新渥捫心增慙

被寵愈驚此蓋伏遇皇帝陛下盛德好生至仁善貸昊

穹報況有三靈之薦釐德澤旁流無一物之失所肆容

疵賤亦玷恩榮臣敢不早夜以思造次於是息黥補劓已

深愧于生成効命捐軀尚冀收于尺寸

謝復官表

陳瑩中

天慈廣大筆詔均平靡容纖介之私遂成溥博之施恩  
光曲逮感涕橫流伏念臣稟資下愚積習迷謬屢竄皆  
由於自取百非難逭于人言螻蟻何知身庇堯天之大  
鷦鷯未殞命餘湯網之寬艱危孤蹤栖遯莫景方省循  
于既往豈叙復之敢期今頓釋于久羈實大踰于初望  
此蓋伏遇皇帝陛下乾行剛健離照融明泯異轍之多

歧會衆流于一海此疆爾界齊成大有之年古律今聲  
合奏太平之曲致朽株之蒙潤由沛澤之不偏簪紱難  
勝但益履冰之懼筋骸已憊莫酬骨肉之恩志常効于  
傾葵誓敢忘于結草

謝復官表

李成季

天地既交適契施生之序雷雨方作悉霑曠蕩之恩歸  
復官資洗除罪戾莫知手舞但極涕零中謝伏念臣材  
非過人學不知道濫登仕版誤置書林必有可觀未始

錚錚而驚世終無他異但能碌碌以同塵逮躡省闈遽  
叅宰屬偶官僚之有請謂國憲之當更初無預于講論  
漫不思其抵謬罪同破律議在謹誅止鐫階秩之微聊  
殿籍書之末豈謂矜前車之既失開局步于自新川澤  
納汙一歸曠度父母愛子皆出至情此蓋伏遇皇帝陛  
下堯性生知舜聰遠格庶事憂勤而協帝小心寅畏以  
事天常善救人恐匹夫之失所爲能盡物期一視以同  
仁曾是孤生亦蒙盛澤併還舊物復領真祠官守不出

于田廬家餐盡資于廩粟葵藿之心常在終幸照臨犬馬之力已衰空慙養一無裨報獨負生成雖已寢于桑榆顧未填于溝壑猶能中田擊壤日陪野老之歡聲清夜焚香每效封人之善祝

謝復職表

晁之道

肇新盛禮敷錫湛恩顧雖已廢之蹤均逮更新之澤職還書殿恩假祠宮曲被寵靈交揮感涕中謝伏念臣學非自得愚仍不移早遘休嘉備蒙識拔中罹憂患薦至

顛隳屢見收於罪戾之餘迄無取于毫釐之効逮茲屏  
伏益悟竒窮災疾相仍寢閤歲時之晚雲霄已邈敢希  
雨露之私忽此叨逢實逾願望此蓋伏遇皇帝陛下延  
釐神物均福海隅政用包荒施不忘遠致茲孤陋亦玷  
登庸竊食丘園深愧可陳之力傾心天日永懷未報之  
恩

謝落致仕表

胡文定

蒲柳早衰難待引年之禮絲綸垂獎遽叨復仕之恩拜



命知榮省躬加惕中謝伏念臣本由質陋亦因數奇少  
也收科謂功名之可必壯而就養覺心事之多違既辜  
吸菽之歡仍抱采薪之戚欲影纓而弗遂因斂轡以言  
歸江海飛鳧不爲加少蓬蒿息鷄豈曰知還交遊莫記  
於寒溫形影相忘于贈答縱寧夜氣終歎前修敢圖數  
澤之蹤猶動冕旒之聽此蓋伏遇皇帝陛下量兼覆載  
智燭隱微體萬物以同仁張四維而礪俗廣振混淪之  
士用彰靖退之規誤及迂愚曲加褒勉而臣衛生素拙


嬰疹未蠲念丹赤之欲輸恨筋骸之難強步趨緩縱目  
視昏花一壑風煙甘作養疴之地五雲觀闕空懷拱極  
之心

謝起復知越州表

王豐父

起于苦塊付以麾符聖主異恩小臣難報中謝伏念臣  
衰遲朽質憂患餘生方待盡於倚廬遂䟽榮於分閭屢  
陳哀懇仰扣聽聞靡回從欲之仁特下發中之詔深惟  
小己曷稱殊私屬文陛之對揚奉遽旒之清問念前朝

輔相之久無易先臣助一時制作之功尤憐舊績紀嘉  
祐受遺之事暨元豐定策之勲肆宸筆之一揮破讒言  
于萬古金杯賜第玉篆題碑盡還他日之遺榮皆出至  
神之獨斷茲蓋伏遇皇帝陛下舜躬聰哲湯德寬仁部  
室久幽輝之日采霜叢旣槁振以春華重念臣昔歲奉  
親分符承乏湖山再覩唯觸目以增悲父老重迎咸稽  
顙而太息鞭笞靡用獄訟頓清永念不忘之恩旣踰高  
厚將伸莫報之德敢憚糜捐



五百家播芳大全文粹卷六中

欽定四庫全書

集部

五百家播芳大全文粹卷

六下  
七上

詳校官編修

臣謝振定

助教

臣常循覆勘

總校官編修

臣王燕緒

校對官中書

臣葉蘭

謄錄監生

臣任銜葵

欽定四庫全書

五百家播芳大全文粹卷六下

宋 魏齊賢

葉 芬同輯

謝表

宮觀 侍養

謝宮祠表

周益公

用踰其分宜嘑民瞻詔許其歸尚叨祠秩思與天而爲

大感無地以寄言臣中謝伏念臣猥以妄人生逢昭代不自量其才力乃過竊以寵榮久合按閒夙嘗控請屬飛龍之聖作疇不歸心雖老馬之力疲詎忘戀主少需三月方敢一言誤蒙英睿之知優假弼諧之禮王人疊至親札下攷凡可示于留行已畢全于故實逮請議弗容之際猶隆私未替之初內揆冥頑仰辜造化茲蓋伏遇皇帝陛下待人以恕馭下惟公念臣早侍元良徐致保全之意知臣自貽衆怒難專予奪之私聽辭湘水之

魔俾領祥源之使擢髮不足以數愚臣之罪捐軀不足以  
酬聖主之仁惟憑香火之緣上祝乾坤之素

謝宮祠表

王信

杜門省咎分安田里之居出綈䟽恩叨賦祠庭之廩眷  
由宸念感極愚衷臣中謝伏念臣奮自諸生幸逢昭代  
粵從乾道淳熙之際誤蒙壽皇聖帝之知擢寘周行屢  
更歲琯郎曹宰掾戎監銀臺游陪峻域之游旋冒禁塗  
之選惟知職守敢爲身謀曲荷保全第從免去不謂英



主飛龍之始乃記微臣如蟻之蹤茲蓋伏遇皇帝陛下  
睿職自天聰明協帝方紹休于帝統首垂意于人材竊  
觀播告之新每及論思之舊初覃霈渥枚拭之澤優嗣  
拜詔音咨詢之旨切顧如庸瑣弗忍棄捐獨于浹旬之  
間被此寵光之厚臣敢不益堅素履仰答鴻私小器易  
盈姑竊斗升之活大恩難報敢忘畎畝之忠

謝宮祠表

引年謝事將懲不諳之愆優老子祠尚竊無功之祿恩

憐至矣報稱謂何臣中謝伏念臣稟資至愚謀身甚拙  
勞勤書癖惟五三六經之傳奔走塵容殆四十五年之  
久心勦形瘵齒豁頭童念當休影以處陰且欲息黥而  
補劓祈上遷于官政庶終盡于天年聖度兼容俞音尚  
闕憐其衰晚畀以珍臺祿足以代其耕遂免啼饑之患  
食焉而怠其事難逃尸素之譏茲蓋伏遇皇帝陛下智  
燭旁昭仁天廣覆方萬物之咸覩無一夫之或遺馬不  
收而烏啄瘡曲加軫念鹿自走而庖須肉俾免憂疑推

此橫恩全其末路臣敢不佩帶自戒吞舌知非友麋鹿  
侶魚蝦自適優游之願先狗馬填溝壑敢忘報効之思

謝宮祠表

王信

奉香火之緣雖愚臣之舊物拜絲綸之寵實聖主之新  
恩載省妄庸倍增荷懼臣中謝伏念臣稟資疎拙際運  
休明比叨兩省之聯寢歷五年之久知竭忠而報上敢  
避怨以謀身退還譴訶分甘閑散不謂荷蒙睿眷省記  
孤蹤方竊祿于祠庭旋叨榮于邊閭正虞弗稱乃得斯

行茲再被于俞音俾復霑于渥惠康人繼粟庖人繼肉  
深愧罔功饑者得食寒者得衣若爲報德茲蓋伏遇皇  
帝陛下雍熙萬化愛惜羣材苟非甚無用之人常軫不  
忍棄之念謂臣鷲鈍亦世涓塵收其尺寸之長活以斗  
升之養臣敢不勉安厥守思答所蒙第慮微軀未免月  
費歲糜之誚尚堅晚節以酌天施地生之恩臣無任

謝宮觀表

胡文定

懇誠上竄懼獲嚴訶隆旨下頒許從私願驚魂稍定厚

德難忘

中謝

伏念臣資稟冥頑生平踣蹇頃叨綸掖不

敢誤朝數犯權臣遂令去國孤忠莫効宿疹頓侵敵騎  
猖狂痛山河之失險漢儀照耀幸神武之中興召自柴  
門超居瑣闥與消川謗免中駭機復降袞袞延登要路  
湛恩稠疊盡糜殞以爲期弱體尫殘恨欽承而弗獲遠  
趨行闕恭俟俞音特荷天慈俾安祠館此蓋伏遇皇帝  
陛下乾坤合德日月齊明假病木之濃滋委覆盆之餘  
照俾霑餼廩不蹈風霜憑仗寵靈雖迫摧頽之景精勤

藥石更圖補報之方

謝宮觀表

晁之道

阜財無術省己多愆尚汙琳館之優除益載皇慈之曲  
被橫流涕泗深覲面顏中謝伏念臣愚不自量妄嘗有  
志寧殺身而徇主不營私而爲名乃以一介么微之下  
才而當九府夥繁之劇任特逢睿寵殊異輩流固已懼  
於顛隳蓋久溢其分量非主張之有素已竄殛之是加  
爲屈公言止從薄責坐縻廩祿俾色養之弗違盡脫憂

虞冀沉痾之遂息併諧僥冒更極驚慙此蓋伏遇皇帝  
陛下格天溥臨如日徧照示之罰而使知過加之怒而  
弗忍誅致庶政之惟和靡一夫之失所乃如疵賤亦在  
哀矜臣敢不內訟往愆仰思明訓覲獲收之末路誓必  
踐于初心倘九死之可耐豈餘生之敢惜

謝宮觀表

晁之道

沉痾載塗已甘殞越凌兢俟命亟荷允俞罪大恩深慙  
多感涕中謝伏念臣陳力寡薄賦命邅迍念溢器之易盈

宜災疾之崇降心體俱弊精誠並衰曾不自保于朝昏  
顧何以寄夫民社雖欲強勉非所堪任輒丐領于祠宮  
庶獲親於醫藥恩施如此枯朽更榮此蓋伏遇皇帝陛下  
明察幽微仁霑動植曲矜疲瘵欲更安全貪戀明時倘  
未填于溝壑徘徊莫齒猶有報于生成

謝宮觀表

張全真

引分投閒實緣衰病籲天得請仰沐慈憐名參秘殿之  
清職庀真祠之秩拜恩優渥撫已兢慙中謝伏念臣稟



性至愚謀身甚拙早從言責浸冒睿知初無借筭之游  
談遍歷高華之妙選得時則駕豈知富貴之危機直道  
而行竊慕聖賢之往躅奚經綸之小補積尸素之深憂  
况迫衰殘久妨賢路輒伸悃悃屢瀆宸旒感荷天明不  
違人欲許辭榮于禁地俾就錄于祠庭雖三徑已荒無  
復鄉閭之舊業而一瓢可樂終爲聖世之逸民此蓋伏  
遇皇帝陛下體徧物之堯仁懋勤邦之禹績兼收羣策  
宏濟多艱於小大之臣各極其器能而進退之禮曲全

于體貌遂令孤藐終獲便安繫天蓋地容莫報君親之  
賜雖山深林密敢忘畎畝之忠

謝宮觀表

晁之道

赦蠲罪戾澤被庶工雖在空餐亦歸舊秩寵踰其分愧  
積于中臣中謝伏念臣陳力至微叨榮已甚身故閭里

名參禁直之華官無事功居享稍食之厚每虞滿溢更  
逮愆尤敢期俾復于故階將使再臨于名郡丐安舊職  
以養沉痾亟蒙從欲之恩彌有逢辰之幸此蓋伏遇皇

帝陛下仁心天覆德意川流矜此衰殘錫之寵祿和氣  
所被因收藥石之功膂力雖愆猶冀涓塵之効

謝許侍養表

胡文定

瀝懇許私自投誠于君父蒙恩賜可獲供職于庭闈仰  
報矜憐惟知拜舞中謝伏念臣未能自信何所取材濫  
陪入彀之英徒急抱關之祿光陰任再蹤跡飄零瞻羞多  
闕于占甘晨夕少諧于定省祗膺嚴命感激愚衷叱馭  
戒塗夢寐碧雞之佳境牽衣結戀徘徊烏鵲之深情矧

當喜懼之年深計短長之日臣而留令無所逃誅子或  
委親亦將安用况鮮友恭之助已驚血氣之衰因露悃悰  
冒干旒宸幸逃嚴譴仰奉俞音伏遇皇帝陛下孝通神  
明德配高厚崇六行之舉於以明倫凡一物之微悉皆  
得所俯念服勤之請俾安就養之方施等丘山命輕草  
芥臣敢不謹當盡心明善本務爲仁羞救水以致歡餓  
體膚而弗悔學如未至更殫早夜之思忠或可移終有  
糜捐之地

賜詔

傳宣

獎諭

宣召

赦書

謝乞宮祠不允賜詔慰勞表

張全真

嬰疾病之支離籲天有請拜訓詞之溫厚踏地難勝思  
未慙而技窮感既深而涕隕中謝伏念臣一違軒陛遽  
閱三秋數奉絲綸連牧兩郡宣布中和之政拊循凋瘵  
之民期德意之遐孚豈勞心之敢憚久纏羸疾竄身已  
類于清漳不任劇繁卧閣殆同于東海深虞瘵曠遂露忱  
誠非敢專圖安便之私實恐上誤使令之意未蒙賜可

更假褒榮此蓋伏遇皇帝陛下德大包荒仁深念舊以  
嘗承乏于帷幄或可借重于藩垣故雖衰遲不忍捐棄  
報乏暮年之政宜即譴訶賜均一札之書猥叨勞勉倘  
未先于溝壑誓仰答于乾坤

謝乞宮祠不允賜詔表

張全真

晚境卧病枕詞屢瀆至仁藏疾溫詔嗣頒恩既渥而言  
殫感益深而涕隕中謝伏念臣起自三吳之故里游更

兩越之名藩意廣才疎心勞政拙顧七閩雖稍遠在諸

路爲最優姦盜翦除民方奠枕雨暘順適歲有積倉使  
臣自擇以居易地豈復加此况于衰謝豈不懷安但以  
稟氣素孱衛生仍拙節宣無術致六沴之陰乘湯劑罔  
功逮三醫之徧謁遂披情赤仰扣穆清庶幾少避劇繁  
慙依羸瘵亦匪專爲便私之計誠恐自貽曠職之誅豈  
謂慈憐尚閔俞旨頒坦明之帝制申賁孤蹤瞻咫尺之天  
威敢違睿訓茲蓋伏遇皇帝陛下堯仁天大湯聖日躋  
久任以責成功兼容而收衆智故雖病瘁不忍棄捐再

念臣視息僅保于餘生精爽未還于舊觀愧丙少卿之  
德寧復享封非汲長孺之賢詎能卧治終虞瘵敗上玷  
使令誓殫體國之誠庶幾掇朽而摩鈍尚有首丘之志  
終期置散而投閒

謝乞宮祠不允賜詔表

冒貢忱辭期遂養病之素志俯頒溫詔猥蒙藏疾之深  
仁假榮便藩撫懷震惕中謝伏念臣名浮于實用過所  
長二府徧更守樸忠而自信三州詳試慙善狀之無聞



福旣過而挺災氣早衰而被病茲睿哲大有爲之旦正  
臣工思自盡之時固將効州縣之微勞庶或佐朝廷之  
大計心勞跡拙欲陳力而不能外強中乾歎衛生之無  
術與其坐俟曠瘼之責曷若亟披悃愾之愚乞解麾符  
庶少親于藥石未頒俞旨復申錫于絲綸此蓋伏遇皇  
帝陛下廊上聖之英姿建中興之偉業雅重牧民之寄  
不忘念舊之心知臣粗歷于藩宣當更責成于悠久謂  
臣雖嬰于疾恙猶堪卧治于平時怛然深厚之辭貴此

藐孤之跡疏恩既渥况瞻咫尺之威避事有嫌且懼再  
三之瀆欽承睿訓勉竭駑才倘後効之可圖宣餘生之  
足惜

謝詔書宣諭表

張全真

臨遣星輶撫傷痍之遠俗俯頒帝綍形惻怛之溫言仰  
睿渥之東漸騰歡聲之北拱中謝恭惟皇帝陛下躬禹  
勤儉性湯寬仁總攬權綱體德刑于冬夏巡行方嶽省  
耕斂于春秋顧黎元久困于干戈慮詔令徒施于墻壁

深求民瘼益固邦基尚憂聖澤之未宣分遣使華而申  
諭選求時望假之憲府以重其事權賜對便朝付以璽  
書而稽其課最欲大蘇于凋瘵期盡掃于繁苛武夫感  
涕以銜恩癯老扶攜而觀化臣猥司屏翰謬布教條念  
久侍于清光亦粗知於德意坦然明白奉以周旋何止  
楚王撫三軍而挾纊敢師漢吏期千室之鳴絃

謝詔書獎諭表

王豐父

沃壤千里本廟算以經營賜札十行辱天褒之優渥鼓

鐘導從父老俱瞻喜動公庭光生私室中謝竊以稽山  
故國鑑水巨湖昔矣渺茫則就其深而瀦水今茲堙塞  
乃因所利以爲田仰神考之有爲自熙寧而經始幅員  
幾七百里首尾逾五十年浸歷居諸益多膏腴與其爲  
強民盜占而私已孰若立法制拘利以供官曩緣文陛  
之對揚親奉遽旒之清問欽承密旨來治餘疇悉稟宸  
謨魯無費于毫髮坐興厚利誠有補于倉箱迨此第功  
獨先假寵祇奉綠綈之賜實均華袞之榮茲蓋伏遇皇

帝陛下道冒八垓明照萬里紹帝勲而高古耕王籍以  
勸農撫撫周原或被涵濡之澤茫茫禹跡載成經啟之  
功臣自視疲駑謬當委寄既乏居官之可紀又豈有功  
之足知政愧潁川誤奉褒揚之詔情同天保願歌歸報  
之詩臣無任

謝詔書獎諭表

張全真

瞽言冒獻瀆已懼于再三聰聽無容慮不遺于千一肆  
頒溫詔俯賁寒蹤稽首拜恩銘心載德中謝伏以亮雖

狂悖挾敵騎以長驅睿主憂勤整戎車而夙駕天威臨  
赫士氣賈餘紛萬里以爭先袞羣策而並用臣頃陪帷  
幄久備藩垣衰遲蒲柳之姿蹇淺芻蕘之論初非言責  
祝敢意于代庖竊歎時危嫠靡遑于恤緯輒披悃愍少  
助詢謀敢謂仰契廟謨特彤天獎煥發絲綸之重蔚增  
簪履之榮此蓋伏遇皇帝陛下文即康功湯昭聖武陳  
師鞠旅捷書屢上于甘泉舍已從人訪問每勞于衢室  
猥加勞勉誤及庸虛一札十行不替始終之遇四郊多

壘示通遐邇之情臣敢不味深厚之訓詞體蓋容之大德老當益壯誓九隕以爲酬知無不言庶萬分之或補

謝傳宣撫問表

張全真

叨紆郡組未聞襦袴之謠就遣使軺俯賁絲綸之寵吏民改視山水增輝

中謝

伏念臣夙被簡知久陪嚴近薦

臨帥閭錄屏翰之微勞還付經帷極儒生之榮遇而臣久苦陰陽之寇復經風波之塗力乞就閒屢投誠于黼衣曲蒙從欲更假寵于藩垣慙德意之未宣辱溫言之遽

及此蓋伏遇皇帝陛下天臨寰海子惠臣工愛民務極  
于撫綏念舊加隆于禮貌尤軫奇孤之迹特頒深厚之  
辭煖然如春載榮蒲柳之質就之如日但傾葵藿之心  
誓勉効于微勞庶仰酌于異眷

謝傳宣撫問表

未能五月而報政方懷尸素之羞仰惟一視而同仁薦  
沐撫存之渥使華洎館輿誦載塗豈惟寒陋之增華咸  
識聖明之念舊中謝伏念臣才鍾疎竅景迫衰殘繼叨



剖竹之榮雖殫智力數困負薪之疾蔑著事功已荷優  
容更垂簡記臨遣王人之重俯傳天語之溫此蓋伏遇  
皇帝陛下正五事以承天心推赤心而置人腹眷股肱之  
輔郡德澤宜先軫帷幄之近臣寵私未慙每由形于慰  
藉以增重于觀瞻而臣體方中于沉疴神未還于舊  
觀固當自力思稱所蒙倦鳥知還終冀迺于曠責靈虵  
咸報庶或免于後圖

謝傳宣撫問表

澤國承流茂著蕃宣之効星軺傳命薦頒深厚之詞仰

睿眷之有加顧微蹤之豈稱

中謝

伏念臣猥以凡器早

踐要津荷黼宸之誤知入陪二府叨朱轡之重寄出殿

三州志大何爲性疎寡與毫髮莫聞于補報筋骸屢困

于沉綿周旋郡舍之幾時絡繹使車之及境溫言甚寵

拜命加榮此盖伏遇皇帝陛下道大兼容智能旁燭憐簪

履之舊物曾侍燕閒錄屏翰之微勞益隆體貌衰遲自

省榮懼交并雖撫字爲勤未有及民之善政而寵光若

此敢忘致主之初心當益勤于後圖誓無慙于晚節

謝傳宣撫問表

下車問俗始欲布于寬條乘驛經途遽欲頒于溫詔拜

恩稽首懷感銘心臣

中謝

伏念臣向蒙特達之知久玷

高華之選大恩未報已迫衰殘睿眷有加曲垂簡記復

畀上流之重寄敢辭行路之阻修念違睟穆之容未踰

月律亟賁坦明之訓就遣星軺式慰羈孤益隆體貌此

蓋伏遇皇帝陛下廓漢高之大度推光武之赤心雨露

所濡天何心于遠近絲綸之出人自改于觀瞻仰恃寵  
臨庶逃罪戾倘少收于薄効敢自愛于餘生

謝傳宣撫問賜藥表

輟九重之近密俯資溫言軫三伏之炎歊寵頒珍劑思  
非常擬感溢情深中謝伏念臣一去闕庭再罹寒暑餘  
齡晚晚病骨支離未耐覆載之私每迫陰陽之寇欲逃  
瘵敗歸乘下澤之車敢謂記憐加賜上池之藥此蓋伏  
遇皇帝陛下坐恢遠略力致中興在知人在安民不泄

邇不忘遠察臣久陪帷幄粗忠樸而無他以臣遠守江湖假威靈而增重閭歲華之殆半辱使驛之游臨臣敢不勉竭疲駑少圖補報俗期無犯田收賣劍之牛病或有瘳身効銜環之雀

謝傳宣撫問賜藥表

臣某言十二月五日伏蒙聖恩差入內侍省高班主管合同憑由司王錫到府傳宣撫問并賜臣銀合臘茶者臨遣星軺速若置郵而傳命俯頒奩劑威無咫尺之遠

顏登受以還兢榮自失中謝伏念臣叨分近輔莫著微  
勞頽齡浸迫于西山况嬰衰疾短景適臨于北陸尤若  
祁寒是資服食之良以禦晦明之沴豈蕭然之枉質特  
簡在于清衷既賁溫言復加珍賜尚方修製靈于紫府  
之丹御寶絨封貯以白金之器王人俯洎父老歡迎此  
蓋伏遇皇帝陛下居上克明使人以禮俾盡股肱之力  
庶全體貌之誠念臣頃參帷幄之籌義同休戚憐臣密  
備藩垣之寄衆所觀瞻特假寵靈以榮觀聽起漳濱之

沉瘵指日以須存魏闕之精誠戴天知感誓圖九殞仰  
報萬分

謝傳宣撫問賜藥表

王介甫

睿使寵辭載華原隰寶奩珍劑加賁丘園臣中謝伏念  
臣少出衡茅晚陪帷幄德輜寄重才淺知深但念里居  
長負丘山之責敢期宸眷尚留簪履之矜此蓋伏遇皇  
帝陛下天幬無疆海涵不棄戴難忘之盛德豈特銘肌  
撫易盡之餘生唯當結草

謝賜詔藥物表

輟宮闈親近之臣臨湖海寬閒之野授之藥物撫以訓  
辭尸厚祿而無勞謂當誅絕捐大恩而不報彌所兢慙  
臣中謝伏念臣出本羈單自甘淪棄晚由樸學上誤聖  
知智魯昧于保身忠每懷于許國讒誣甚巧竊憂解免  
之難危拙更安特荷眷憐之至况遠跡久孤之地實邇  
言易問之時而離明昭晰于隱微解澤頻繁于踈逖此  
蓋伏遇皇帝陛下以上仁含垢以大智容愚弗使南箕



得侈簸揚之狀更令北戶坐蒙臨照之光繭然垂盡  
之病軀沲若橫流之感涕惟困窮無理猶致命于一餐  
顧冒昧不貲敢忘懷于九死

謝獎諭表

晁之道

遵奉聖謨繕修戎備載紆睿獎增激懦衷中謝竊以朔  
方輿區天下重地神考講安邊之策盡古今之所長聖  
朝廣嗣武之聲兼小大而畢舉維是城守之具未完萃  
聚之功親喻德音往圖偉績遂一新于戎器益坐震于

天威實惟聖制之修明亟獲事功之建立顧慙迂拙誤  
玷寵褒此蓋伏遇皇帝陛下天運沉機日昭獨智務講  
兵家之上策以究聖人之極功兼錄微勞用勸羣吏臣  
敢不免驅駕蹇圖稱使令定正山川薦克就緒惟茲一  
道方促奏功斯仰體于顧懷誓永堅于忠節

謝獎諭表

犴獄屢空皆本克寬之德璽書亟下倍懷非據之慚仰  
窺眴驚俯揆戰慄中謝竊以畿分千里輻輳萬邦雖有

趙張之才猶限獄市之寄乃今朞月忽三敝于園扉考  
古盛隆未一書于方冊豈有司能使其不犯宜聖主獨  
以爲極功顧錄微勞普加獎雲章垂象已旁燭于三  
辰奎璧載圖仍諦瞻于八法夫何冒昧獲此遭逢此蓋  
伏遇皇帝陛下大德好生成功宰物罔兼庶獄遂臻刑措  
之隆申勸羣工特厚袞褒之寵而臣雖參寶試獨負空  
餐上懼貪天以爲功下愧因人而成事永藏漢禮自欣  
千載之時力誦堯仁願拜萬年之壽

謝獎諭表

張全真

臣某言近者本路諸處羣盜相繼平殄緣久勤聖慮畧具奏知今月初三日伏蒙詔書獎諭者四郊多壘盡陶簫勺之和一札成文誤被絲綸之寵吏民改視山水增輝臣中謝竊以盜起貧窮故詩人詠盈止而後寧止治貴清淨故循吏謂勝之不若安之矧惟江西稍遠闕下狙齧訟之習而稔熟其兵甲遭焚掠之暴而隳廢其田廬蟻聚蜂屯既結而不散草薶羣殄垂盡而復生上軫九重之憂尤艱一路之寄如臣本無術略加以衰遲親承訓勅之音恭布寬大之詔人非木石固知懷德以歸心惟有豺狼亦或畏威而革面至于遣戍兵而督捕殲首惡以示懲政以罔悛殆非得已故稍戢弄兵之俗汔可小康未能臻奠枕之期曠然大變心既寬於憂顧跡頗類于言功乃蒙旌閭制之微勞降璽書而褒諭人所助者信也實由聖德之誕敷臣何力之有焉徒愧恩言之重渥此蓋伏遇皇帝陛下懋湯大德達舜四聰孝通

神明外默孚于強敵化行江漢內自格于羣偷欲獎勵于庶工故推揚于一善臣敢不仰體勸功之德意銘深厚之訓詞俯思善後之方息愁嘆于田里庶幾晚節不辱睿知

謝遣中使撫問表

王介甫

孤臣疲曳自阻進趨聖主慈憐猶加撫諭中謝伏念臣晚陪休運特荷異恩橫草無功每恨棄軀之晚負親有疾仍慚制祿之優豈謂陛下所總萬機不忘一物乃因輜軒之出俯逮躋樓之遺仰荷眷私唯知感涕

謝宣召表

含哀去國扶憊造朝黻坐禁嚴許之燕見玉堂閎麗賜以叨居申飭使人就傳德意事雖有故寵實非常莫知報稱之謂何徒荷眷求之如此

謝赦書表

張全真

際河之封再歸版籍配天之澤覃被幅幘疾置流傳輿情呼舞臣中謝臣聞晉廢符秦于淝水之上猶勤八萬

之師吳奔曹魏于赤壁之旁僅保三分之地糜爛其民  
而戰功烈如彼而卑坐視中原以資敵國曾未有不煩  
遺鏃遂得侵疆卓然標一代之勲煥乎如今日之懿此  
蓋伏遇皇帝陛下廣大配天地孝悌通神明料強敵于  
沉機決大疑于獨斷修政事而復周境何愧宣王敷文  
德以格苗民遠符虞帝既獲和戎之利大推肆眚之仁  
臣夙贊鈞衡薦分藩翰惠此中國已共沐于湛恩撫在  
四夷願永觀於丕顯

五百家播芳大全文粹卷六下